



REPUBLIKA E SHQIPËRISË
KOMISIONERI PËR MBROJTJEN NGA DISKRIMINIMI

Nr. 112/4 Prot.

Tiranë, më 07 / 04 / 2025

V E N D I M

Nr. 76, Datë 07 / 04 / 2025

Bazuar në nenin 32/1/a dhe nenin 33 të ligjit 10221/2010 “Për Mbrojtjen nga Diskriminimi”, të ndryshuar, Komisioneri për Mbrojtjen nga Diskriminimi mori në shqyrtim ankesën nr. 09, datë 14.01.2025, e Znj. Xh., G., kundër Ndërmarrjes së Shërbimeve Mbështetëse të Kopshteve dhe Çerdheve, Bashkia Korçë, me pretendimin për diskriminim të fëmijës së saj, A. G., për shkak të gjendjes ekonomike dhe aftësisë së kufizuar¹.

Në përfundim të shqyrtimit të ankesës, Komisioneri për Mbrojtjen nga Diskriminimi,

K O N S T A T O I:

I. Parashtrimi i fakteve sipas subjektit ankues.

Sipas shpjegimeve të dhëna në formularin e ankesës, subjekti ankues informon: “*Quhem Xh. G. Jam nënë e dy fëmijëve të mitur, ku një prej tyre është nxënëse në klasën e parë pranë shkollës 9-vjeçare “Demokracia”. Në muajin nëntor, u lajmërova nga mësuesja kujdestare për të dorëzuar dokumentacionin në shkollë për të përfituar bursë për vajzën A. G. Kam dorëzuar vërtetimin e KEMPIT të kunatës sime, e cila jeton me mua dhe në certifikatën familjare është kryefamiljare. Ajo ka statusin e invaliditetit, dhe bashkëshorti im është shoqëruesi i saj. Se bashku me to, kam dorëzuar gjithashtu dokumentacionin plotësues që është kërkuar.*

¹ Kunata e ankueses/antare e familjes si kryefamiljare, është me aftësi të kufizuar dhe trajtohet ndihmë ekonomike për paaftësi në punë.

Në muajin dhjetor dolën listat me emrat e përfituesve, ku emri i vajzës sime nuk figuronte si fituese. Kontaktova me drejtuesen e shkollës dhe e pyeta për shkakun e mospërfitimit të bursës dhe përgjigja e saj ishte për mungesë dokumentacioni, megjithëse unë i kisha dorëzuar të gjitha dokumentet që më ishin kërkuar nga ana e saj (dokumenta të njëjtë me këto që po depozitoj pranë jush). Gjithashtu, ajo më informoi që nuk është kompetencë e shkollës dhënia e bursës, por kjo është në kompetencë të Bashkisë Korçë.

Për më tepër, siç e kam përmendur edhe më lart, jam nënë e dy fëmijëve të mitur, ku më i vogli është 2 vjeç. Nuk punoj rregullisht, as unë as bashkëshorti im, pasi kemi kumatën e paralizuar në shtëpi dhe na duhet të kujdesemi për të”.

Subjekti ankues kërkon nga Komisioneri për Mbrojtjen nga Diskriminimi, konstatimin e diskriminimit të tij nga ana e Ndërmarrjes së Shërbimeve Mbështetëse të Kopshteve dhe Çerdheve, Bashkia Korçë, për shkak të aftësisë së kufizuar dhe gjendjes ekonomike, si dhe për marrjen e bursës.

Nga shqyrtimi paraprak i ankesës, u konstatua se:

Në nenin 1 të ligjit nr. 10221, datë 04.02.2010 “Për Mbrojtjen nga Diskriminimi”, të ndryshuar, përcaktohet se: “Ky ligj rregullon zbatimin dhe respektimin e parimit të barazisë dhe mosdiskriminimit në lidhje me racën, etninë, ngjyrën, gjuhën, shtetësinë, bindjet politike, fetare ose filozofike, gjendjen ekonomike, arsimore ose shoqërore, gjininë, identitetin gjinor, orientimin seksual, karakteristikat e seksit, jetesën me HIV/AIDS, shtatzëninë, përkatësinë prindërore, përgjegjësinë prindërore, moshën, gjendjen familjare ose martesore, gjendjen civile, vendbanimin, gjendjen shëndetësore, predispozicionet gjenetike, pamjen e jashtme, aftësinë e kufizuar, përkatësinë në një grup të veçantë, ose me çdo shkak tjetër”.

Në bazë të nenit 7, të ligjit nr. 10221/2010 “Për Mbrojtjen nga Diskriminimi”, të ndryshuar, mbrojtja nga diskriminimi garantohet ndaj çdo veprimi ose mosveprimi të autoriteteve publike ose të personave fizikë a juridikë që marrin pjesë në jetën dhe sektorët publikë ose privatë, që krijojnë baza për mohimin e barazisë ndaj një personi apo grupi personash, ose që i ekspozon ata ndaj një trajtimi të padrejtë dhe jo të barabartë, kur ata ndodhen në rrethana të njëjta ose të ngjashme, në krahasim me persona të tjerë ose grupe të tjera personash.

Bazuar në nenin 32/1/a të ligjit 10221/2010 “Për Mbrojtjen nga Diskriminimi”, të ndryshuar, Komisioneri ka kompetencë për të shqyrtuar shkeljet që i bëhen zbatimit dhe respektimit të parimit të barazisë në lidhje me këto shkaqe.

Gjatë shqyrtimit të kësaj ankese, Komisioneri ka marrë në shqyrtim vetëm ato çështje, që bëjnë pjesë në kompetencat e tij, të parashikuara nga ligji 10221/2010 “Për Mbrojtjen nga Diskriminimi”, i ndryshuar.

Në zbatim të parashikimeve ligjore, të përcaktuara në nenet 32/2 dhe 33 të ligjit 10221/2010 “Për Mbrojtjen nga Diskriminimi”, të ndryshuar, Komisioneri për Mbrojtjen nga Diskriminimi, ka shqyrtuar çështjen duke ndërmarrë hapat si më poshtë:

- Me shkresën nr.112/1, datë 27.12.2024, Komisioneri për Mbrojtjen nga Diskriminimi, ka njoftuar Bashkinë Korçë dhe Ndërmarrjen e Shërbimeve Mbështetëse të Kopshteve dhe ka kërkuar informacion dhe dokumentacion provues lidhur me pretendimet e subjektit ankues.

Me shkresën nr.70 prot., datë 23.01.2025 , administruar pranë Komisionerit me nr. 112/2 prot., datë 27.01.2025, Ndërmarrja e Shërbimeve Mbështetëse të Kopshteve dhe Çerdheve, Bashkia Korçë, ka informuar Komisionerin se:

Për përcaktimin e “Kuotave financiare të ushqimit në mensa dhe konvikte, si dhe përcaktimin e kriterëve për përfitimin e bursave dhe të pagesave për nxënësit e arsimit parauniversitar në Institucionet Arsimore publike”, citojmë se vlerësimi i kriterëve bëhet duke u bazuar në:

- *Vendimin e Këshillit të Ministrave nr. 666, datë 10.10.2019, me nr. 9488 Prot. datë 15.10.2019, për “Kuotat financiare të ushqimit në mensa dhe konvikte, dhe përcaktimin e kriterëve për përfitimin e bursave dhe të pagesave për nxënësit e arsimit parauniversitar në Institucionet Arsimore publike”.*
- *Vendimin nr. 511, datë 27.07.2022, me nr. 6642 Prot. datë 29.07.2022, “Për disa ndryshime dhe shtesa në Vendimin Nr. 666, datë 10.10.2019, të Këshillit të Ministrave, për ‘Kuotat financiare të ushqimit në mensa dhe konvikte dhe përcaktimin e kriterëve për përfitimin e bursave dhe të pagesave për nxënësit e arsimit parauniversitar në Institucionet Arsimore publike’”.*

Sipas këtyre dy Vendimeve të Këshillit të Ministrave:

Znj. Xh.G., ka kërkuar bursë për fëmijën e saj, A. G, nxënëse në shkollën “Demokracia”. Sipas informacionit nga Drejtoria e shkollës, prindi ka dorëzuar dokumentet për të aplikuar për bursë pranë kësaj drejtorie. Shkolla i ka pranuar dokumentet dhe i ka dorëzuar ato pranë Ndërmarrjes së Shërbimeve Mbështetëse të Arsimit dhe Çerdhës. Nga ana jonë, dokumentacioni i dorëzuar është pranuar dhe është shqyrtuar së bashku me të gjitha dokumentat e tjera të të gjithë nxënësve që kanë aplikuar për bursë.

*Nxënësjë A. G., nuk ka qënë përfituese e bursës për vitin shkollor 2024-2025 pasi me dokumentat që ka dorëzuar për aplikim nuk mund të klasifikohet në asnjë nga kriteret për përfitimin e bursës sipas VKM nr. 666, datë 10.10.2019, i ndryshuar. Znj. Xh. G., pretendon se duhet të përfitojë bursë sipas kriterit 2.3/d të VKM nr.666, date 10.10.2019 sepse ka kunatën, të cilën e ka në certifikatën familjare, me aftësi të kufizuara. Por në këtë pikë thuhet shprehimisht: **d) nxënësit, fëmijë të personit/personave që gëzojnë statusin e invalidit;** dhe dokumentacioni që kërkohet për të aplikuar për bursë është:*

- *Çertifikatë personale;*
- *Çertifikatë familjare;*
- *Vërtetim nga shkolla (për regjistrim, frekuentim të rregullt dhe jo mbetës);*
- *Vërtetim mbi statusin e invaliditetit dhe pagesën e pensionit të invaliditetit të prindërve;*
- *Vërtetim nga tatimet që ka/nuk ka biznes për çdo person madhor të familjes.*

Bazuar në këtë pikë nxënësja A. G., nuk mund të jetë përfituese e bursës sipas këtij kriteri, pasi mbështetur në dokumentacionin e dorëzuar pranë nesh, asnjëri nga prindërit nuk gëzon statusin e invalidit.

Po ashtu nxënësja nuk mund të jetë përfituese edhe sipas kriterit ekonomik pasi prindërit nuk kanë vërtetime nga zyra e punës si punëkërkues të papunë.

- Me shkresën nr. 112/3 prot., datë 11.02.2025, të Komisionerit, drejtuar ankueses, i është përcjellë shkresat e institucionit për të bërë kundërshtimet e saj. Nga ana e ankueses nuk u kthye asnjë përgjigje, edhe pse rezulton që sipas lajmerim-marrjes të Postës Shqiptare sh.a, Nr. RR 728 425 021 AA, ajo e ka marrë në dorëzim këtë shkresë më datën 11.02.2025.

Vlerësimi i fakteve dhe provave të grumbulluara nga Komisioneri gjatë procesit të shqyrtimit të çështjes.

A. Lidhur me trajtimin disfavorizues dhe të pabarabartë.

Komisioneri për Mbrojtjen nga Diskriminimi ka marrë në shqyrtim pretendimet e ankueses për trajtimin diskriminues në procedurën e ndjekur për përfitimin e bursës për fëmijën e saj , për shkak të gjendjes ekonomike dhe aftësisë së kufizuar.

Diskriminimi përkufizohet nga ligji 10221/2010 “*Për Mbrojtjen nga Diskriminimi*”, i ndryshuar, në nenin 3, pika 1, si: “*“Diskriminim” është çdo dallim, përjashtim, kufizim ose preferencë, bazuar në cilindo shkak të përmendur në nenin 1 të këtij ligji, që ka si qëllim ose pasojë pengesën ose bërjen të pamundur të ushtrimit në të njëjtën mënyrë me të tjerët të të drejtave e lirive themelore të njohura nga Kushtetuta e Republikës së Shqipërisë, aktet ndërkombëtare të ratifikuara nga Republika e Shqipërisë, si dhe nga ligjet në fuqi*”.

Mbështetur në detyrimet ligjore të parashikuara në nenin 3 të Kushtetutës të Republikës së Shqipërisë në të cilën shteti merr masa për mbrojtjen e dinjitetit të njeriut dhe respektimin e lirive dhe të drejtave të tij, nenit 14 të Konventës Evropiane të të Drejtave të Njeriut, ligjin 10021/2010 “*Për Mbrojtjen nga Diskriminimi*”, të ndryshuar, Komisioneri për Mbrojtjen nga Diskriminimi synon respektimin me rigorozitet të parimit të barazisë përpara ligjit, barazi të shanseve dhe mundësive për të ushtruar të drejtat dhe liritë, si dhe zbatimin e efektshëm të politikave antidiskriminuese.

Procedura dhe dokumentacioni i përfitimit të bursës rregullohet sipas përcaktimeve të VKM-së VKM nr. 666, datë 10.10.2019 *“Për kuotat financiare të ushqimit në mensa e konvikte dhe përcaktimin e kritereve për përfitimin e bursave e të pagesave për nxënësit e arsimit parauniversitar në institucionet arsimore publike”*; të ndryshuar me VKM nr. 511, datë 27.07.2022.

Nga ana e ankuses na janë vënë në dispozicion në cilësinë e provës:

- Vërtetim nr.134/29 prot., datë 29.10.2024 i Shkollës 9-vjeçare “Demokracia”, Korçë, me anë të cilit vërtetohet se A. M. G., është nxënëse e klasës së parë pranë kësaj shkolle për vitin shkollor 2024-2025.

- Certifikatë e gjendjes familjare e datës 19.12.2024.

- Vërtetim për përfitim të ndihmës ekonomike i Shërbimit Social Shtetëror, me anë të cilit vërtetohet se z/znj., me NID: J75601078B (znj. Xh. G.) nuk është përfituese e ndihmës ekonomike si anëtar i familjes/individ në nevojë.

- Vërtetim i datës 20.12.2024 i Drejtorisë Rajonale të Tatimeve Korçë që vërteton se znj. Xh. G. nuk është e regjistruar.

- Vërtetim i datës 26.12.2024 i Drejtorisë Rajonale të Tatimeve Korçë që vërteton se z. M. G., nuk figuron i regjistruar për ushtrim aktiviteti pranë DRT Korçë.

- Vërtetim i datës 23.12.2024 i Drejtorisë së Kujdesit Social, që vërteton se znj. E., G., (kunata e ankuses) trajtohet me paaftësi, në shumën 12676 lekë.(Shënim: z. M. G., është kujdestar me pagës në shumën 13315 lekë në muaj)

Sa më sipër, Komisioneri do të shqyrtoj këtë çështje në bazë të shpjegimeve të dhëna nga ankuesja në Formularin e ankesës e saj, dokumentacionit shoqërues si dhe informacionit të dhënë nga Bashkia Korçë me shkresën 70 prot., datë 23.01.2025.

Në këtë kuptim, referuar VKM nr. 666, datë 10.10.2019 *“Për kuotat financiare të ushqimit në mensa e konvikte dhe përcaktimin e kritereve për përfitimin e bursave e të pagesave për nxënësit e arsimit parauniversitar në institucionet arsimore publike”*; të ndryshuar me VKM nr. 511, datë 27.07.2022, personat që kërkojnë të trajtohen me bursë, duhet të aplikojnë dhe të dorëzojnë dokumentacionin e kërkuar, pranë Institucioneve Arsimore jo më vonë se muaji tetor dhe pranë Këshillit Bashkiak në fund të muajit dhjetor.

Në pikën 2, të këtij vendimi përcaktohet se:

2. Nxënësit, të cilët ndjekin arsimin parauniversitar me kohë të plotë dhe arsimin e mesëm profesional në institucionet arsimore publike, përfitojnë bursë brenda kuotave dhe kritereve, si më poshtë vijon:

2.1 Kriteri ekonomik:

.....

c) nxënësit, fëmijë të familjeve në nevojë, me ndikim në uljen e nivelit të “braktisjes shkollore”, që janë regjistruar në arsimin bazë, por, në pamundësi financiare, nuk ndjekin arsimin bazë.

2.3 Kriteri joekonomik:

.....

d) nxënësit, fëmijë të personit/personave që gëzojnë statusin e invalidit;

Referuar provave dhe informacionit të vënë në dispozicion nga palët, rezulton se ankuesja ka aplikuar për të përfituar bursën për vajzën e saj për herë të parë, por nuk i plotëson kushtet për të përfituar sipas legjislacionit të sipërcituar, pasi së pari ajo apo bashkëshorti i saj nuk figurojnë si punëkërkues të papunë nga Zyra Vendore e Punësimit Korçë, gjithashtu nuk rezulton të jetë përfituese e ndonjë skeme ekonomike/sociale, si familje në nevojë.

Në lidhje me pretendimin se ajo nuk punon në mënyrë të rregullt se ka kumatën të paralizuar dhe bashkëshorti kujdeset për të, dhe si prind me dy fëmijë jeton në kushte të vështira ekonomike-sociale, Komisioneri vlerëson se:

Ligji nr.57/2019 “Për asistencën sociale në Republikën e Shqipërisë”, i ndryshuar, sipas përcaktimeve të nenit 3, të tij, zbatohet për individët, familjet në nevojë, personat me aftësi të kufizuara në Republikën e Shqipërisë dhe nënat me foshnja të porsalindura, për ofrimin dhe garantimin e asistencës sociale, me përjashtim të kufizimeve të vendosura në nenin 11 të këtij ligji.

Në nenin 4, të këtij Ligji, ndër të tjera përcaktohet se:

“Në kuptim të këtij ligji, termat e mëposhtëm kanë këto kuptime:

.....

c) “Bashki/njësi administrative”, është institucioni nën juridiksionin e të cilit personat përfitues, sipas këtij ligji, ushtrojnë të drejtën për të kërkuar mbështetje me të ardhura monetare ose/dhe në natyrë, të cilat u mungojnë plotësisht ose pjesërisht, si dhe për të kërkuar mbështetje për adresimin e situatës së tyre social-ekonomike drejt programeve të tjera sociale, shëndetësore, të punësimit, strehimit;

d) “Familje”, është një grup individësh, që lidhen në marrëdhënie bashkëshortore, marrëdhënie prindër-fëmijë, marrëdhënie ndërmjet anëtarëve të familjes dhe ato të kujdestarisë, të cilët jetojnë në të njëjtën strehë;

e) “Fëmijë”, është çdo person nën moshën 18 vjeç dhe, në rastin kur mosha e personit është e pamundur të përcaktohet saktë, por ka arsye të besohet se personi është fëmijë, ai konsiderohet fëmijë, në kuptim të ligjit për mbrojtjen e të drejtave të fëmijës;

.....

k) “Ndihma ekonomike”, është mbështetja me para, që u jepet familjeve dhe individëve në nevojë, sipas përcaktimeve të bëra në këtë ligj;

Në kreun II, “Përfituesit e asistencës sociale”, neni 6, i po këtij Ligji, përcakton se: *“Asistenca sociale përfshin, por nuk kufizohet në, ndihmën ekonomike, pagesat e aftësisë së kufizuar, ndihmën e menjëhershme financiare për foshnjat e porsalindura dhe përfitime të tjera, që garantojnë nga ky ligj.”*

Sipas nenit 7, “Përfituesit e ndihmës ekonomike”, shkronja a, e tij, përfituesit e ndihmës ekonomike janë: *“.....a) familjet në nevojë, që nuk kanë të ardhura ose kanë të ardhura të pamjaftueshme.”*

Neni 7 i LMD-së², i ndryshuar, në pikën 1 të tij, parashikon se: *“Çdo veprim ose mosveprim i autoriteteve publike ose i personave fizikë a juridikë që marrin pjesë në jetën dhe sektorët publikë apo privatë, që krijojnë baza për mohimin e barazisë ndaj një personi apo grupi personash, ose që i ekspozon ata ndaj një trajtimi të padrejtë dhe jo të barabartë, kur ata ndodhen në rrethana të njëjta ose të ngjashme, në krahasim me persona të tjerë ose grupe të tjera personash, përbën diskriminim”.*

Ligji për mbrojtjen nga diskriminimi ndalon situatat kur persona ose grupe personash në një situatë të njëjtë trajtohen në mënyra të ndryshme, dhe situatat kur personat ose grupet e personave në situata të ndryshme trajtohen njësoj.

Komisioneri, pas shqyrtimit të provave të administruara gjatë hetimit të ankesës, vlerëson se ankuesja nuk plotëson kushtet e përcaktuara nga legjislacioni i aplikueshëm për të përfituar bursën për vajzën e saj sipas kriterit ekonomik, referuar dispozitave të parashikuara. Së pari, për kriterin ekonomik, ankuesja dhe bashkëshorti i saj nuk figurojnë si punëkërkues të papunë sipas të dhënave të administruara nga Zyra Vendore e Punësimit në Korçë. Për më tepër, asnjëri prej tyre nuk është përfitues i ndonjë skeme ekonomike ose sociale, si familje në nevojë, siç konfirmohet nga vërtetimi negativ i lëshuar nga Shërbimi Social Shtetëror.

Gjithashtu, ankuesja ka pranuar në ankesën e saj se ajo kryen punë në mënyrë të parregullt, ndërkohë që bashkëshorti i saj ka statusin e kujdestarit për motrën e tij dhe është paguar për këtë status nga Shërbimi Social Shtetëror.

Në përfundim, pas shqyrtimit të provave dhe vlerësimit të situatës ligjore dhe faktike, Komisioneri ka arritur në përfundimin se ankuesja dhe bashkëshorti i saj nuk përmbushin kërkesat ligjore dhe kushtet e parashikuara për të përfituar bursën për vajzën e tyre sipas këtij kriteri.

Ndërkohë kërkesa për përfitimin e bursës për nxënësen A., G., e pretenduar sipas kriterit joekonomik atë të aftësisë së kufizuar, sqarojmë se në zbatim të përcaktimeve të bëra në VKM nr. 666, datë 10.10.2019 *“Për kuotat financiare të ushqimit në mensa e konvikte dhe përcaktimin e kriterëve për përfitimin e bursave e të pagesave për nxënësit e arsimit parauniversitar në*

² Shkurtesë për Ligjin për Mbrojtjen nga Diskriminimi, të ndryshuar.

institucionet arsimore publike"; të ndryshuar me VKM nr. 511, datë 27.07.2022, është parashikuar se: 2.3 Kriteri joekonomik: d) nxënësit, fëmijë të personit/personave që gëzojnë statusin e invalidit;

Sipas dokumentacionit të vënë në dispozicion, rezultoi se asnjë nga prindërit e nxënës A., G., nuk gëzon statusin e invalidit për të përfituar sipas këtij kriteri të përcaktuar në aktin e sipërcituar. Ky kriter është i parashikuar vetëm për ata individë që janë të regjistruar si invalidë (*prindër të nxënësit*), dhe asnjë nga prindërit e nxënës nuk është përfitues i këtij statusi. Faktin që kunata e ankueses është person me aftësi të kufizuar, nuk është i parashikuar si kriter në këtë akt dhe, për këtë arsye, nuk i jep të drejtën ankueses për të përfituar bursën e parashikuar për këtë shkak, pavarësisht se ajo është anëtar i familjes dhe figuron në certifikatën familjare.

Për sa kohë që kërkesa e ankueses nuk ka përmbushur të gjitha kriteret e përcaktuara në aktin nënligjor aktual në fuqi, mbi bazën e të cilit është trajtuar kërkesa për përfitimin e bursës për vajzën e saj e saj, institucioni ka detyrimin ligjor për të zbatuar këto parashikime dhe për të mos e pranuar kërkesën. Për pasojë, nëse kriteret dhe dokumentacioni i kërkuar nuk janë plotësuar, Bashkia është e detyruar të respektojë kriteret e vendosura për përfitimin e bursave dhe të refuzojë përfitimin, në përputhje me rregullat dhe procedurat e përcaktuara.

Sa më sipër, mbështetur në ligjin 10221/2010 "*Për Mbrojtjen nga Diskriminimi*", të ndryshuar, si dhe nga analizimi në tërësi i fakteve të sipërpërmendura, Komisioneri vlerëson se fëmija i ankueses nuk është ekspozuar ndaj një trajtimi të padrejtë dhe të pabarabartë, nga ana e Bashkisë Korçë. Në mungesë të trajtimit të padrejtë dhe të pabarabartë, Komisioneri gjykon se nuk kemi të bëjmë me diskriminim për shkak të pretenduar nga ankuesja.

PËR KËTO ARSYE:

Mbështetur në nenin 1, nenin 3/1, neni 7/1, nenin 32, pika 1, gërma a), si dhe nenin 33, pika 10, të ligjit 10221/2010 "*Për Mbrojtjen nga Diskriminimi*", të ndryshuar, Komisioneri për Mbrojtjen nga Diskriminimi,

V E N D O S I:

1. Konstatimin e mosdiskriminimit, të nxënës A. G³, nga ana e Bashkisë Korçë, për shkak të gjendjes ekonomike.
2. Rekomandohet që Bashkia Korçë, të marrë masa për:
 - miratimin e një akti administrativ ku të jenë përcaktuar qartë kriteret dhe dokumentacioni përkatës për përfitimin e bursave, sipas parashikimeve të VKM-së nr. nr. 666, datë 10.10.2019 "*Për kuotat financiare të ushqimit në mensa e konvikte dhe përcaktimin e kriterëve për përfitimin e bursave e të pagesave për nxënësit e arsimit parauniversitar në institucionet arsimore publike*", të ndryshuar;

³ Përfaqësuar nga nëna e saj Xh. G.

- miratimin e një procedure të qartë për trajtimin me bursa ku aplikantët të pajisen me një dokument, përmes së cilit të vërtetohet fakti i aplikimit, dorëzimit të dokumentacionit përkatës dhe kërkesa për përfitimin nga kriteri specifik sipas VKM-së nr. 666, datë 10.10.2019 *“Për kuotat financiare të ushqimit në mensa e konvikte dhe përcaktimin e kriterëve për përfitimin e bursave e të pagesave për nxënësit e arsimit parauniversitar në institucionet arsimore publike”*, të ndryshuar.
3. Kundër këtij vendimi lejohet ankimi në Gjykatën Administrative të Shkallës së Parë Tiranë, brenda 45 ditëve nga marrja dijeni.

KOMISIONER

Robert GAJDA

Punoi: L. Jani
Pranoi: V. Bushati
Datë: 07.04.2025